

宋丞相李忠定公奏議

宋丞相李忠定公奏議附錄卷之二

建炎進退志總叙上上

靖康元年秋余罷知樞密院事河北河東路宣撫使除觀  
文殿學士知揚州以言者落職提舉杭州洞霄宮責授保  
靜軍節度副使建昌軍安置尋移雲安二年春行次長沙  
蒙恩復舊官除資政殿大學士領開封府事時金寇再犯  
關都城圍閉道路阻絕久之聞命即率湖南勤王之師入  
援王室以四月初啓行自巴陵乘舟泛江五月初次繁昌  
得元帥府檄方審都城破二聖播遷號慟幾絕次太平州  
親今上登寶位赦書改元建炎悲喜交集是時金陵爲叛

卒周德等所據囚帥臣宇文粹中殺官吏居民焚舟船不可勝數劫掠官府士民財物爲之一空雖受發運判官方孟卿招安而探甲乘城殺戮恣橫如故今遣使臣質文檄諭之令聽稟節制勤王乃肯釋甲然猶禁儼不以時登舟擅驅不當行士卒欲乘間遞去次金陵因與轉運判官權安撫使李彌遜謀盡誅其首惡四十六人而以其徒千餘人令提舉常平官王枋統之以行因奉表詣行在賀登極且辭領開封府事之命上書論時事并具奏金陵東南形勝之地新罹兵火宜早擇帥以鎮撫之次寶應聞已降麻呂廷除正議大夫尚書右僕射兼中書侍郎隴西郡開國

侯加食邑實封荷上特達之知感極而繼之以泣次泗上以汴流淺涸捨舟陸行是時四方勤王之師皆已放散因留湖南金陵兵卒於泗奏取指揮獨取數百人防護以往次虹縣始被受尚書省劄子有旨趣行在前此不知余由江淮以來遣使齎賜御書并降詔皆自湖北往至是得金陵奏乃劄報新除有旨也因奉表劄以辭恩命次會亭上遣中使王嗣昌傳宣撫問賜茶藥各一銀合奉表以謝次穀熟御史中丞顏岐遣人投文字封以御史臺印開視之乃論余不當爲相章疏其大意謂張邦昌爲金人所喜雖以爲三公眞王宜更加同平章事增重其禮余爲

金人所惡雖已命相耳及其未到罷之以爲中太一宮使  
兼講筵官置之閑地前後凡五章皆不降出故岐封以示  
余欲余之留外而不進也乃知命相蓋出於淵衷獨斷而  
外廷所以沮之者無所不至益以威懼或勸余不若遂留  
余曰國家艱危至此極矣豈臣子事形迹避嫌疑自愛惜  
之時哉上知遇如此得一望清光敷陳腹心退就田里死  
且不朽如岐言何足恤會復遣使趣召遂行有旨賜御筵  
於金果園命中書侍郎黃潛善押宴尚書右丞呂好問同  
知樞密院事汪伯彥同與即具奏辭免次金果園龍圖閣  
學士兼侍讀董耘來見傳上旨嘗遣從事郎劉黶齎御書

自湖北往迂卿書中有學窮天人忠貫金石方今生民之  
命急於倒懸諒非不世之才何以協濟事功之語感激流  
涕遂如行在遇三執政南都門外告以已具辭免御筵乃  
歸館所時以城北鈴轄司爲府第少頃上遣使趣是進對  
于內殿見上叙致不覺涕泗之橫流上亦感動因奏曰金  
人不道專以詐謀取勝中國而朝廷不悟一切墮其計中  
既登城矣猶假和議已定之說以欺四方勤主之師凡都  
城子女玉帛乘輿服御歷代所傳寶器下至百工技藝無  
不畢取然後劫遷二聖東宮后妃嬪御親王宗室凡係於  
屬籍者悉驅以行遣姦臣傳命廢滅趙氏而立張邦昌僞

號大楚在京侍從百官北面屈膝奉賊稱臣莫有死節者  
自古夷狄之禍中國未有若此之甚賴天祐我宋大命未  
改故使陛下總師千外爲天下臣民之所推戴然墜緒繼  
絕統此非人力乃天授也興衰撥亂待危扶顛內脩政事  
外攘夷狄以撫萬邦以還二聖皆責在陛下與宰相宜得  
有大過人之材智者祖與國治以成中興而考爰之際首  
及繼臣自視缺然力小任重恐不足以仰副陛下特達知  
遇之望聖慈追寢成命改授其入實天下幸甚上曰  
朕知卿忠義智略甚久在靖康時宣方爲多特爲同列所  
不容故使卿以非罪去國而國家有禍故如此朕嘗欲言

於淵聖欲使夷狄畏服四方安寧非相卿不可今朕眇然  
以一身託於士民之上賴卿左右扶持以濟艱難此志已  
定卿其勿辭余頗首泣謝且遣薑耘所傳聖語荷知如此  
雖糜捐不足以報德然臣未到行在數十里間御史中丞  
顏岐封示論臣章疏謂臣爲金人所惡不當爲相如臣愚  
意但知有趙氏不知有金人固宜爲其所惡然岐之論臣  
謂材不足以任宰相則可謂爲金人所惡不當爲相則不  
可臣愚不知金人與趙氏爲仇敵其所喜者爲趙氏耶其  
所惡者爲趙氏耶且爲趙氏之臣而金人喜之此必有以  
得其心者而天用以爲相則自古賣國以與人者皆爲忠

臣矣今陛下用臣斷自淵衷而岐之論如此如臣迂踈自知不足以當重任但願一望清光乞身以歸田里至於陛下命相於金人所喜所惡之間更望聖慮有以審處於此上笑曰岐嘗有此言朕告之以如朕之立恐亦非金人之所喜者岐無辭而退此不足卹余奏曰陛下天縱睿聖固不難察此然臣材力綿薄實不足以勝任因出劄子再拜力辭上慰諭久之遣御藥卻成章宣押赴都堂治事又命執政聚於都堂即上馬歸日已暮矣時六月朔日也翌日有旨立新班奏事對於內殿同執政奏事訖留身奏上曰自古人主惟論一相相得其人則朝廷正而天下之事舉

相非其人則朝廷亂而天下之事廢方承平無事之時猶當考論其相而况艱難多事之際乎譬如負重致遠力祇足以勝百斤而使之荷千鈞之重則必顛路於道路矣以今日國勢觀之外則強敵陵侮二聖在其掌握中內則兵力單弱四方盜賊竊發殘破州縣者不可勝數朝廷之上僭偽之臣方且保崇信任輿聞國政州縣之間官吏廢弛顧望進退視朝廷號令如不聞當此之時雖聖賢馳騁有所不足而欲以臣之迂疎獨任其責雖三月之量有以知其難也易稱鼎折足覆公餗而孔子以謂知小而謀大力小而任重言不勝其任也伏望聖慈憐選天下之有材智

者爲相仰佐陛下共濟艱難而臣憂患餘生得以退藏於  
深淵不勝幸甚上曰卿素以忠義自許豈可於國家艱危  
之時而自圖安閑朕決意用卿非在今日社稷生靈賴卿  
以安卿其無辭余感泣再拜曰臣愚陋無取不意陛下知  
臣之深也然今日之事持危扶顛以創業爲法而圖中興  
之功在陛下而不在臣昔管仲語齊桓公曰不能知人害  
霸也知而不能用人害霸也用而不能任人害霸也任而不  
能信人害霸也能信而又使小人參之害霸也夫知人能信任  
之而參以小人猶足以害霸況於爲天下而欲建中興之  
業乎方靖康之初淵聖皇帝慨然有圖治之意而金人退

師之後漸謂無事不能分別邪正進君子退小人而賢否混淆是非雜揉且和且戰初無定議至其晚節專用姦佞而黜忠良虜騎再來遂有宗社不守之變如臣者徒以愚直好論事爲衆人不容於朝使總兵於外而又不使之得節制諸將自度不足以任責乞身以退而又百端譏譖竄逐遠方必欲殺之而後已賴淵聖察臣孤忠特保全之卒復召用然已無及矣不謂今日遭遇陛下龍飛初無左右先容之助徒採虛聲首加識擢付以宰柄顧臣區區何足以仰副圖任責成之意然靡不有初鮮克有終如臣孤立寡與更望聖慈察管仲害霸之言留神於君子小人之間

使臣得以盡志畢慮圖報消埃雖死無憾昔唐明皇欲相姚崇崇以十事邀說皆中一時之病類多施行後世美之臣常慕其爲人今臣亦敢以十事仰干天聽陛下度其可行者願賜施行臣乃敢受命其未合聖意者願賜折難臣得以盡其說上可之余因出劄子奏陳其一日議國是大略謂中國之御夷狄能守而後可戰能戰而後可和而靖康之末皆失之今欲戰則不足欲和則不可莫若自治專以守爲策伏吾政事修七氣振然後可議大舉其二曰議巡幸六略謂車駕不可不一到京師見宗廟以慰都人之心度未可居則爲巡幸之計以天下形勢觀之長安爲上

張陽次之建康又次之皆當詔有司預爲之備其三曰議  
赦令大略謂祖宗登極赦令皆有常式前日赦書一切以  
張邦昌僞赦爲法如赦惡逆選人循資責降罪廢官盡授  
官職皆汎濫不可行謂當改正以法祖宗其四曰議僭逆  
大略謂張邦昌爲國大臣不能臨難死節而挾金人之勢  
易姓建號身處官禁南面以朝其後不得已乃始奉迎朝  
廷尊崇之爲三公真王參與大政非是宜正典刑垂戒萬  
世其五曰議僞命大略謂國家更大變故解伏節死義之  
士而奉賊旨受僞官屈膝於其廷者不可勝數昔肅宗平  
賊而汙僞命者以大等定罪今宜倣之以勵士風其六曰

議戰大略謂軍政久廢士氣怯惰宜一新紀律信賞必罰以作其氣其七曰議守大略謂賊情狡猾勢須復來宜於沿河江淮措置控禦以扼其衝其八曰議本政大略謂崇觀以來政出多門綱紀紊亂宜一歸之於中書則朝廷尊其九曰議久任大略謂靖康間進退六臣太速功效蔑著宜審擇而久任之以責成功其十曰議脩德大略謂上初膺天命宜益脩孝悌恭儉之德以副四海之望而致中興每劄讀訖又敷陳其所以然上皆令留榻上俟詳觀有當施行者降出翌日降出議國是巡幸赦令戰守五劄餘皆留中次日與執政同奏事于內殿進呈議國是劄子上曰

今日之策正當如此可付中書省遵守次進呈議巡幸制  
子有旨令促留守司脩治京城祇備車駕還闕款謁宗廟  
詔泉興軍襄陽府江寧府增葺城池量修宮室官府以備  
巡幸次進呈議敕令劄子念謂藝祖登進曾赦惡逆今已  
行難遵有旨選人惟有職者循次貢謫降罪廢官令刑部具  
元犯申朝廷等第叙復次進呈議戰議守劄子有旨令討  
論脩舉軍政措置禦條件以聞奏事訖執政退余留身  
奏上曰臣愚瞽輒以管見十事冒瀆天聰已蒙施行五事  
如議本政以佳修德三事無可施行自應留中所有議張  
邦昌僭逆及變偽命臣僚二事皆今日政刑之大者乞早

降虜分上曰執政中有與卿議論不同者更俟款曲商量  
余奏曰邦昌僭運之罪顯然明白無可疑者天下皆謂邦  
昌處虜中歲餘厚結虜酋得其驩心故破都城遷二聖東  
宮盡取親王宗室以行邦昌蓋與其謀此固不可知然邦  
昌當道君朝在政府若幾十年淵聖即位首擢爲相奉使  
虜中方國家禍難之時如能以死守節惟明天下所以戴  
宋之義以感動其心虜人未必不悔禍而存趙氏邦昌方  
自以爲得計偃然當之正位號處官禁者月有餘日虜騎  
既退四方勤王之師集邦昌擅降偽詔以止之又遣郎官  
分使趙野翁廣國等皆齎空名告身數百道以行迨彥國

等因其使而勤王之師日進邦昌知天下之不與也不得已乃請元祐太后垂簾聽政而議奉迎邦昌僭逆始末如此而議者不同臣請備論而以春秋之法斷之若都城之人則謂因邦昌立而得生且免再取科金銀而德之若元帥府則謂邦昌不待征討遣使奉迎而恕之若天下則謂邦昌違號易姓其奉迎特出於不得已而憤嫉之都城德之元帥府恕之者私也天下憤嫉之者公也春秋之法人臣無將將而必誅趙盾有不討賊則書以弑君今邦昌已僭位號賊退而止勤王之師非特將與不討賊而已其罪爲何如昔劉盆子以宗室當漢室中衰爲赤眉所立其後以

十萬衆降先武祗待以不死今邦昌以臣易君其罪大於  
盆子不得已以身自歸朝廷既不正其罪而又尊崇之以  
爲三公真王參與國政此何理也議者又謂邦昌能全都  
城之人與宗廟宮中不爲無功以陛下登極緣邦昌之奉  
迎無邦昌則陛下何以自明臣皆以爲不然譬之巨室之  
家偶遭寇盜主人之戚屬悉爲驅虜而其僕欲奄家室奴  
婢而有之幸主人者有子自外歸迫於衆議不得已而歸  
所有乃欲遂以爲功其可乎陛下之立乃天下臣民之所  
推戴邦昌何力之有臣於劄子中論之詳矣方國家艱危  
陛下欲建中興之業當先正朝廷而尊宗儲德大臣以奉

四方其誰不解體又僞命臣僚一切置而不問何以勵天下士大夫之節執政中有議論不同者乞降旨宣召臣得與之廷辯如臣理屈豈敢復言上許之乃令小黃門宣令黃潛善呂好問汪伯彥再對上語之故而潛善主之甚力大槩不出前所陳詰難數四乃屈服然猶持在遠不若在近之說余曰却昌當正典刑何遠近之有借使在近當幽繫而反尊榮之如此何也潛善不能對上顧呂好問曰卿在城中知其謀謂當如何好問對曰却昌僭竊位號人所共知既已自歸惟陛下裁處又引德宗幸奉天不挾朱泚行後以為悔以附會潛善不若在近之說余曰呂好問之

言首鼠兩端且援朱泚以爲例非是古德宗之將奉天朱泚蓋未反也姜公輔以其得涇軍心恐資以爲變請挾以行德宗不聽而其後果然今邦昌已僭逆豈可使之在朝廷使道路指目曰此亦一天子哉因泣拜曰臣不可與邦昌同列正當以笏擊之陛下必欲用邦昌第懼臣力以爲相無不可者上頗感動而汪伯彥亦曰李綱氣直臣等不及上曰卿欲如何處置余曰邦昌之罪三當誅夷陛下以其嘗自歸質其死而遠竄之受僞命者等第謫降可也上曰俟降出卿劄子來日將上取旨余拜謝既退竊思若邦昌之事順逆曉然而猶費力如此其他豈可不憂是故劉

子果降出翌日同執政進呈潛筆備左右之乃以散官安  
置潭州次進呈議僞命劄子上曰國家顛覆士大夫不聞  
死節往往因以爲利如王及之工蕃衍宅門詬詈諸王余  
大均誘取官嬪以爲妾卿知之古余奏曰自崇觀以來朝  
廷不復敦尚名節故士大夫鮮無寡恥不知君臣之義靖  
康之禍視兩宮播遷如路人然予有能伏節死義者在內  
惟李若水在外惟霍安國死節顯著餘未有聞願詔京畿  
諸路詢訪優加贈恤如王及之余大均朝廷見付御史臺  
推鞠必得其實臣聞方金人欲廢趙氏立張邦昌令吳玠  
莫儔傳道意旨往往數四京師人謂之捷疾鬼王時雍徐

秉哲奉金人旨追捕宗室戚里一令居民結保不得容隱以  
衣挾縣屬以往若囚繫然其後以迫道君東宮后妃親王出  
郊皆臣子之所不忍言又受命命皆爲執政此四人者當  
爲罪首上以詢呂好問而好問以爲有之得旨皆散官廣  
南遠惡州軍安置餘以次謫內王及之余大均胡思陳  
冲等以賊濫繫御史臺候結茶日取旨李若水贈官外霍  
安國贈延康殿學士有死節有令諸路詢訪以聞又進呈  
類岐待罪章疏執政贊上欲令依舊供職有旨令除待制  
與宮觀執政退余留身上曰卿昨日內殿爭張邦昌事內  
侍輩皆泣涕卿今可以受命矣余拜謝曰自非陛下英睿

天縱豈能決斷如此天下不勝幸甚臣雖愚陋敢不罷勉  
自力以圖報稱因爲上言今日國勢比之創業爲尤難蓋  
創業之主乘興起之運積小成大猶或易爲今日當國勢  
委靡不振之時夷狄盜賊憑陵擾攘之後士風偷惰人情  
畏怯府庫空虛郡縣殘破百度廢弛而欲奮厲整頓以成  
中興之功正猶大厦之傾持顛扶危須一一脩葺而材料  
鮮少此所以爲尤難也正賴陛下剛健不息以至誠惻怛  
之意加之不爲群議之所動搖先其大者急者而小者緩  
者徐圖之信任而責成功臣乃得以竭盡思慮以裨補萬  
一臣竊觀自古創業中興之工莫如漢之高祖光武唐之

太宗皆有英明之資寬誠之心仁厚而有容果斷而不惑故能決大事成大功戡定禍亂身致太平臣嘗取其行事大節編爲一書便於觀覽欲繕寫進呈以備乙夜之觀應今日之變誠以數君爲法中興之功亦不難致上可之因論高祖光武太宗數事合於今日者上皆以爲然復奏上曰人主莫大於兼聽廣視使下情得以上通故舜明四目達四聰而天下治今艱難之際四方休戚利害日欲上聞而士民之願效其智慮尤多陛下即大位已踰月而撫鼓院猶未置恐非所以通下情而急先務者上曰屢語執政猶未措置卿可便與施行余退因批旨置登聞鼓院於行

在便門之外差官吏權攝又請置看詳官兩員於侍從職事官中選應士民上封事陳獻利害候降出並付看詳官簽擬可施行者將上取旨又於省門置司以受詞訴公狀至是已三具表劄辭免恩命皆降批荅不允仍斷來章乃詣閣門受告有旨兼充御管使以覃恩告廷轉正奉大夫加食邑實封時六月六日也

建炎進退志總叙上下

是日同執政對于內殿余奏上曰以今日國勢而視靖康間其不逮遠矣然而有可爲者陛下英斷於上而群臣輯睦於下庶幾革靖康之風而中興可圖然而今日之事須

有規模而知先後緩急之序所謂規模者外禦強寇內銷盜賊脩軍政變士風裕邦財寬民力改弊法省冗官誠號令以感人心信賞罰以作士氣擇帥臣以任方面選監司郡守以奉行新政俟吾所以自治者政事已脩然後可以議興舉而問罪金人迎還二聖此規模之大略也至於所當急而先者莫先於料理河北河東兩路夫河北河東者國家之屏蔽也料理稍全然後中原可保而東南可安今棄置兩路不復料理而欲自安於東南譬猶外有寇盜不爲之藩籬而欲安於堂奧其可得乎今河北河東雖爲金人蹂踐而殘破河東所失者忻代太原澤潞汾晉其餘猶

存也河北所失者不過真定懷衛濟四州而已皆靖康之  
未失之真定以新易李邈爲帥懷以折彥質遷去衛以朝  
廷遣使交割濟以無城郭之故其餘中山河間慶源保塞  
雄霸深祁恩冀邢洛磁相信安廣信二十餘郡皆爲朝廷  
守兩路士民兵將所以戴宋者其心甚堅在州郡者依城  
郭無城郭者依大河西山結山寨以爲固皆推豪傑以爲  
頭領多者數萬少者亦不下萬人如此知名字者已十數  
處朝廷不曰此時置司遣使有以大慰撫之分兵以援其  
危急臣恐爲金人所迫糧盡力困坐受其斃強壯而狡獪  
者從賊其次者爲盜老弱稚孺渡河而朝廷何以待之且

金人善因兵於敵兩路軍民雖懷忠義之心使救援之兵  
久而不至危急無告必且憤怨朝廷使金人因得撫而用  
之皆精兵也被復何待借兵於他國哉驅之以擾中原而  
將之以酋首中國之兵亦將望風奔潰未易禦也臣愚以  
謂莫若於河北置招撫司河東置經制司擇有材略者爲  
之使宣諭陛下德意所以不忍棄兩河於夷狄者措置經  
營結連其豪傑而用之救援危急收復州縣朝廷應副錢  
糧告勅有功者即命以官其能保全一州收復一郡隨其  
高下以爲節度防禦團練使如唐方鎮之制使自爲守非  
待絕其從賊之心又可資其力以禦敵朝廷久遠無此顧

之憂此最今日之先務也僉議亦頗以爲然上曰誰可任  
此者余奏曰陛下儻採用臣策臣當詢訪其人續具聞奏  
既退詢於士大夫間多謂張所可以招撫河北傅亮可以  
經制河東而余亦頗聞其爲人張所者山東人以進士擢  
第有材氣謀略當靖康間爲監察御史朝廷以金人再犯  
關欲割棄河北既遣使矣虜騎薄城京師圍閉所在園城  
中獨上言乞以蠟書募河北兵淵聖許之蠟書至河北士  
民皆喜曰朝廷欲棄我於夷狄猶有一張察院欲救我而  
用之乎應募者凡十七萬人故所之聲滿河北部勒既定  
會都城破謀弗果用上即位於南都所首至行在見上論

列且條具應募首領姓名人數合措置事件以聞朝廷欲以爲郎官奉使河北以董其事會所以察官上章論黃潛善及兄潛厚姦邪不可用恐害新政潛善引去上留之乃謫所鳳州團練副使江州安置是時余尚未至行在也故衆謂招撫河北此非所不可然余以所嘗論潛善之故頗難之事既迫他無可使者不得已一日過潛善閣子中相與款語曰吾輩蒙上委任以艱難之秋實負天下之重責而四方士大夫號召未有來者前日議置河北招撫司搜訪殊無人可以承當獨一張所可用又以狂妄有言得罪如所之罪孰不以爲宜第今日事迫矣一失機會悔不可

不得已勢須收執用之如用以為臺諫處要地則不可  
使之借官為招撫死立功以贖過似無嫌第未知於公  
意何如倘能先國事後私怨為古人之所難不亦美乎潛  
善欣然許諾乃薦之於上且道潛善意上悅有旨借所通  
直郎直龍圖閣充河北招撫使是時所已赴謫所遣使臣  
齊劄子名之二十餘日而後至上召對幕書稱旨錫五品  
服內府賜緡錢百萬以備募兵半年錢糧給空名告千餘  
道以京畿兵千人為衛將佐官屬聽自辟置一切許以便  
宜從事有朝請即王圭者真定府人真定既破率衆數萬  
保西山屢勝金賊聞上登極自山寨間道來獻其所謀正

興朝廷同旅道河北事尤詳有旨除直秘閣招撫司參謀  
官使佐所凡留行在者又二十餘日而後行傳亮者陝西  
人以遣功得官諳練兵事靖康初至京師上封事請以親  
王爲元帥治兵於河朔淵聖不喜令押出門其冬復有薦  
者再召之亮至而都城已破率陝右京西勤王兵三萬人  
會皇城下屢立功統御將佐士卒如古人斬斬整一無敢  
犯令者上即位亮詣行在召對除通直郎直秘閣而亮之  
爲人氣勁直議論不能屈折執政不喜之除知滑州滑兩  
經殘破無城壁亮上疏自陳曰陛下復歸東都則臣能守  
滑陛下未歸則臣亦不能守也執政摘其語以爲悖戾不

遂降通判河陽府亮憤懣而去余至行在亮已行使人召  
之乃來與語連日觀其智略氣節真可以爲大將者欲且  
試之乃薦於上以爲河東經制副使而以觀察使王瓌爲  
使瓌系陝西人素立邊功僉謂在武臣中可用者上宣諭  
亮前蹠中語余廣上意而奏曰人臣論事言不激切不足  
以感動人主激切則近謗訕故昔之聽言者必察其所以  
如果出於謗訕何所逃罪至於有所激而云則必恕之以  
求諫言如周昌之對高祖劉毅之啓武帝皆人之所難堪  
者而主恣之以其有所激故也亮之言如此但欲激陛  
下以歸忠師耳非有它故願聖度有以含容之且人材難

得而將帥之材爲尤難如亮者今未見其比異日必能爲朝廷立大功氣勁言直乃關陝氣俗之常不足深責上乃許如所請並召對賜璽袍帶賜亮五品服與兵萬人告勅銀絹與川綱之在陝西者詔京西陝西漕臣應副糧草餘如張所已得旨而遣之初余既建議以料理河北河東爲所當先者適後宮降誕皇子率執政入賀余奏上曰皇子降誕考之組宗故事當肆赦陛下登寶位赦已曠蕩獨遺河北河東而不及勤王之師天下尚缺望夫兩路爲朝廷堅守而赦令不及人皆謂已棄之何以慰忠臣義士之心而勤王之師雖不曾用在道路半年探甲荷戈冒犯霜雪

亦已勞矣病瘼危亡者不可勝數恩卹不次後日復有急  
雖何以使人願因今赦諸義德意上嘉納改皇子赦於二  
者尤詳又請降詔褒慰兩路守臣將佐軍民諭以朝廷措  
置救援不棄之意守臣各轉兩官進職餘具職位姓名以  
聞又詔自今有賊收復兩路已陷州郡及救解危急保全  
一方功效顯著者並除本處節度觀察團練防禦使依方  
鎮法又詔兩路軍民自今不得撰造事端以疑慮擅殺官  
吏又命使臣齎夏藥徧賜兩河守臣將佐又命權貨務印  
造見錢鈔遣使齎送兩路州郡又命降見錢鈔三百萬貫  
付河北東路陝西路漕司廣羅應副兩路又命起京東路

夏稅絹絲大各府椿管川綱河東衣絹於永興軍椿管以  
待兩路衣係於是兩路知天子德意人情翕然蠟書日至  
間有破賊捷報虜人圍守諸郡者往往抽退而山寨應招  
撫經制司募者甚衆又擇武臣可用者置沿河巡察使自  
河陽抵噴澮凡六處各有地分以爲斥堠而階善建議今  
馬忠將所部兵會雄州子箭手李成所募兵凡五萬人擣  
虜入界虜必釋諸郡之圍以自救余曰解雜亂紛紛者不  
控捲救關者不搏機批亢擣虛形格勢禁則自爲解此因  
古法但今日士怯兵弱恐未可以係入而馬忠者在靖邊  
初雖嘗宣力其後官崇志滿自愛惜不肯決戰屢則

不足次任此莫若使之與張所協力先復潘衛懷三州士  
氣既振乘勢鼓行而北則諸郡之圍必解而真定可復河  
北可以得無事矣事固有因時而制宜者此也是時金人  
留兵三州祇數千人餘皆驅虜吾民剝剪用之張所遣間  
與之結連多願爲內應者以官軍民兵相表裏而圖之功  
可指日而成也余之策出此而潛善堅執其議上可之余  
不歆力爭乃以忠爲河北經制使而以張換副之換者陝  
西人質朴有謀而善戰其材遠勝於忠既使副忠又令與  
張所相應援而換亦以余之策爲然進呈諫官鄧肅論僞  
命臣僚劄子多已行遣而肅曾在圍城中知之爲尤詳有

未及者數人皆等第行遣如十友之類令留守詢訪姓名以聞其言頗及呂好問好問者中公夷簡曾孫以元祐黨籍以困州縣士大夫頗推其恬於仕進靖康初余薦於淵聖以爲諫官其後爲侍從却昌偕遂以爲執政而好問嘗以蠟書至元帥府故上即位首擢爲右丞肅論之頗怒而侍御史王賓亦上疏極言好問在園城中方淵聖拘於虜營宜以蠟書至元帥府督進師而反勸進爲懷貳而挾姦無大臣節况嘗汚德命不可以立新朝好問慙求去甚力乃除資政殿學士知宣州又進呈肅論耿南仲父子章疏上旨南仲誤淵聖罪天下共知朕嘗歆手劍擊之夫復何

道乃以散官安置嶺南而其子延禧落龍圖閣學士令隨侍又進呈王賓論范訥趙野王襄總師逗遛不進而縱其下暴掠甚於寇盜章疏有旨降官分司而賓論之不已乃皆以散官安置又論京西湖北爲金人盜賊侵犯有能以死固守而保全一方者有賊未至而先遁遂失守者謂軍褒黜以明功罪如趙子松之守陳趙子櫟之守汝閻尊忠之守蔡黃叔敷之守襄陽李彥卿之守漢陽郭倬趙令禪之應援黃州縣令陳規之守德安程千秋之守公安皆宜褒賞有旨轉兩官或與職名而以令禪知黃州規知德安千秋通判荊南如陸德先之棄隨州鄭雍之棄荊南舒舜

舉之棄郢州趙縱之棄復州皆宜黜罰有旨降兩官落職  
有類此者言事官條具以聞又論折彥質爲宣撫副使而  
逃亡入川峽錢蓋爲陝西制置使而逃至湖北許高許亢  
防河而逃至江南倘不懲戒則後孰肯以死任責者有旨  
彥質數官安置高亢編管嶺南蓋落職降官分司會南康  
軍毒高亢寓其境欲謀變守倅以便宜誅之而待審衆謂  
擅殺爲沸是余曰淵聖委高亢守河付以兵將甚衆賊將  
至而先走以鐵騎五百自潁昌寧家趨江南沿路劫掠甚  
於盜賊朝廷不能正軍法而一軍壘守倅敢誅之必健吏  
也使後日受命捍賊者知退走而郡縣之吏有敢誅之者

其亦少知戒乎是當賞上亦以余言爲然乃命各轉一官  
是時范訥王襄服而開封府與留守關官余薦宗澤於上  
以爲留守非澤不可澤漸東人自爲小官即卓犖有氣節  
敢爲不詭隨於世以故屢失官靖康間知磁州上以康邸  
持節使虜中時金人已再犯河北澤力挽留以爲不可行  
其後有元帥之命遂即大位澤之功爲多同列忌之譖毀  
百端不得留府中既而除知襄陽府余到行在澤適至與  
語衮衮可聽發於忠義至慷慨流涕故余力薦之上笑曰  
澤在磁凡下令一切聽於崔府君余奏曰古人亦有用權  
術假於神以行其令者如田單是也澤之所爲恐類於此

京師根本之地新經擾攘人心未安非得人以鎮撫之不  
獨外寇爲患亦有內變可虞使澤當職必有可觀上許之  
乃除延康殿學士知開封府兼留守澤至京師果能彈壓  
撫循軍民畏愛脩治城池樓櫓不勞而辦屢出師以挫賊  
鋒雖嫉之者深竟不能易其任也知北京徐處仁死余薦  
杜克代之而以劉錫代克守滄州又頗易置諸路帥臣監  
司及京東西守臣然常患帥材之難得也一日上批出遷  
汪伯彥知樞密院事而除張慤同知慤是時方自河北都  
轉運使除戶部尚書初至行在余因對奏上曰慤以財利  
動幹爾以爲戶部尚書乃其任也今纔供職遽除執政不

惟太峻未副人望兼戶部財計賴慈措置乞少緩之候聲  
措置財計稍就緒日除擢未爲晚陛下用宰相臣不得而  
與至執政臣當聞敢以爲請上乃止令遷伯彥而以潛善  
遷門下侍郎兼中書後二十餘日竟除慈蓋潛善主之也  
余因對復奏曰臣前欲少緩張慈除命非沮之正欲藉其  
力措置戶部事今陛下已擢用慈乞且以戶部事委之乃  
命慈兼總領戶部財用上又令以許景衡爲中丞王實除  
諫議大夫時景衡以給事中召未至余奏曰陛下以景衡  
爲中丞誠得其人然故事中丞無自外除者王賓遷則臺  
中無長官乞候景衡至行在日降處分上許之是時除侍

從卿監卽官館職以補班列之闕及召赴行在者多未至而行在官出自園囿中者多求東南差遣以自便上命余草詔以戒諭之其獲許輸至余薦之於上謂輸外柔內剛學行純美謀議明決宜在左右參與大政上亦喜其論事乃以爲尚書右丞然輸之來脫不能有助也初汴河上流爲盜所決者數屢決口有至百步者閉塞久不合乾涸月餘綱運不通兩京乏糧米價騰踊朝廷責降都水使者陳求道榮巖皆爲散官依舊領監事又命提舉京城所陳良弼同共措置凡二十餘日而水復獲綱運沓來乃令三分留一於行在每綱到卽間撥入京師糧始足米價始平

又擇使臣八員爲汳巡檢每兩員將兵五百人自洛口  
管認地分至西水門分布防禦乃免濫決之患又於兩京  
城外及汳汴至泗增置巡檢商賈始通人情始漸復舊命  
進奏院即吏分兩番赴行在增給食錢朝廷差除鏤板傳  
報外路增置馬遞鋪添給錢糧命令始通州郡命綱運入  
京者還載諸部公案圖籍赴行在官府始有稽考蓋行在  
草創凡百皆逐一施行措置悉類此也

建炎進退志總叙下上

一日同執政奏事內殿余留身進呈三劄子一曰募兵二  
曰買馬三曰募民出財以助兵費余奏上曰國家以兵爲

重方熙豐盛時內外禁旅合九十五萬人至崇觀間而闕額不補者幾半西討夏人南平方寇北事幽燕所折閱者又三之一至靖康間金城再犯國潰散逃亡者又不知其幾何方建炎初天下勤王之師集於郤城側者三十餘萬人其間多係召募民兵僞降王卒之可用者留十餘萬屯要害州郡運糧給之以急募兵亦足以壯聲勢而備緩急朝廷乃一切放散而京東河北之兵在元帥府者又皆援例以歸遂使行在禁旅單弱雖從蒐裒其勢不多何以捍強敵而鎮四方今已散之兵既不可復追而東南之人其性輕剽不可使之遠戰耐勞苦習戰陣惟西北之人可

使為今日之計莫若取財於東南募兵於西北方河北之人為金人搔擾未有所歸之時而關陝京東西流為盜賊強壯不能還業者甚眾乘此遣使四路優給例物以招募之新其軍號勒以部伍得十數萬人付之將帥以時教閱訓練不年歲間皆成精兵於要害州郡別置管房屯戍使之更番入衛行在此最今日不得已之急務也夫金人專以鐵騎取勝而中國馬政不修騎兵鮮少乃以步軍當其馳突宜乎潰散蓋祖宗朝養馬於監牧孳生蕃盛所在雲布故軍旅之用足至崇觀間監牧廢而為給地牧馬有其名而無其實既無孳生馬益銷耗其後燕山陷沒馬之入

於夷狄者不可勝數金人初犯闕河北京畿之馬爲之一  
空其後破都城首下令括馬而京師之馬入于賊者萬有  
餘疋今行在騎兵旣已不多又皆疲劣官馬旣無獨陝西  
京東西諸路尚有私馬宜降指揮立格尺以善價買之可  
以濟一時之乏民間養馬必皆上戶及僧道命官之家中  
下戶自無馬可養取之旣不厲民而旬月間馬遂可集朝  
廷討論監牧之制修復馬政命四川茶馬司益市馬責在  
年歲之外馬不患乎不足此亦今日不得已之急務也國  
家新罹寇難京師帑藏悉爲益人所取外路州郡以調發  
勤王之師財用爲之一空今募兵買馬括捉盜賊措置

邊事應副殘破州縣振舉百度以圖中興非常賦之所能  
供辦又不可橫賦暴斂科取於民如免夫錢天下至今咨  
怨惟上二等物力有餘之家可行勸誘使斥其贏餘以佐  
國用而以官告度牒之類償之使朝廷軍馬精強措置邊  
事就緒盜賊衰息彼乃得保其財產不然雖欲保家室不  
可得况財產哉宜命州縣委曲諭以德意必有樂輸從命  
者此又今日不得已之急務也然募兵買馬勸民出財全  
藉州縣官吏體朝廷德意而奉行之其有抑勒科配致搔  
擾者重寘于法奉行有叙不擾而辦者量加旌賞合諸路  
監司保明按察以聞則三者可以指日而辦上皆以爲然

命以劄子付中書省條具取旨乃與黃潛善商議於陝西河北募兵各三萬人於京東西募兵各二萬人合爲十萬許召募白身於諸色廂軍中揀選招收潰散兵卒改刺創置軍號號勝壯捷忠勇義武龍武虎威折衝果毅定難靜邊凡十軍每號四軍每軍二千五百人例物白身人全給依上禁軍法量增分數餘給半許用諸路關額禁軍錢常平司錢不足即自朝廷應副每募及一軍就本路選差有材武大小使臣充將官部隊將押赴行在內京東西委兩路提刑司河北委招撫司陝西委經制司而以錢蓋依舊爲陝西經制使初蓋在靖康間嘗議河外湟鄯之地於

朝廷無毫髮利而歲費不貲爲中國患不若求青唐之後  
而立之使撫有其舊部以爲藩臣朝廷省費而新邊弓箭  
手皆可徙置河內以備使令有益麻党征者故王之子素  
爲國人信服儻封立之必得其力至是用其策故遣蓋爲  
使齎告賜益麻党征措置湟鄯事而因委之以募兵又議  
買馬分爲三等格尺價直除命官將校見養馬不許括買  
外餘盡籍記赴官揀選及格尺中被帶者即時給還價直  
每及百疋差官一員管押赴行在隱寄委員有馬不籍及  
無馬而勒令置買者並科違制之罪委逐路提刑司總  
之又議募民出財宜降詔曉諭俾州縣勸誘有能出財助

國者籍記姓名多寡申朝廷給降度牒償之人財多者取  
旨推恩應勸誘到錢物並別項橋管聽候朝廷指揮專充  
募兵買馬緣邊事支用若有敢科配搔擾者命官竄責吏  
人決配委監司按察凡募兵買馬勸民出財奉行有叙保  
明推賞中書條具進呈有旨從之又議措置控禦修舉軍  
政余謂唐之方鎮當時實賴其力以定患難第措置失宜  
而其後行姑息之政威柄浸移乃有尾大不掉之患祖宗  
革去其弊削弱州郡之權一切委以文吏非沿邊諸路雖  
藩府亦屯兵不多無敢越法行事以處太平無事之時可  
也一旦夷狄長驅盜賊蠢起州郡莫有能抗之者遂至於

手足不足以捍頭目爲今之計莫若稍倣方鎮之制擇人任之假以權勢減上供錢穀使之養兵而訓練之大小相維遠近相接庶幾可以救今日之患夫方鎮者節度使之兵也其次有觀察團練防禦今既以爲階官不可復改宜於沿河沿淮沿江諸路置帥府要郡次要郡使帶總管鈐轄都監以寓方鎮之法許其便宜行事辟置寮屬將佐以治兵不數年間必有可觀昔馬燧之鎮大原也承勲防之後兵力衰軍燧募廩使悉補騎士教之戰數月成精卒居一年開廣場集兵三萬威震北方李抱真之鎮澤潞也乘戰伐後賦重人困軍秣剛初乃籍戶三丁擇一調其糧租

給弓天令閏月得比偶習射歲終大校親按籍第歛否賞  
責比三年皆爲精兵舉所部得戍卒二萬遼雄山東天下  
稱昭義步兵爲諸軍冠此方鎮之效也要在得人以任之  
寬其銜勒以責成功而誅賞廢置之柄悉在朝廷使無不  
運捍之患則今日控禦之策宜無大於此者至於軍政當  
法古撥今而更張之古者自伍兩卒旅積而至於二千五  
百人而爲師又積而至於萬二千五百人而爲軍其將帥  
正長皆素具敵平居恩威足以相照行陣節制足以相使  
若身運臂而臂使指無不可者此所以能捍患禦敵而成  
功也國朝之制雖以五十人爲一隊五百人爲一指揮而

有欲出師始命將佐取其臨時兵將初不相識而欲其臨  
患難而用命指揮如意蓋亦難矣今宜法古五人爲伍中  
擇一人爲伍長五伍爲甲別選一人爲甲正四甲爲隊有  
隊長正副二人五隊爲部有部將正副二人五部爲軍有  
正副統制官節制統制官有都統節制都統有大帥皆平  
時選定閑居則閱習有故則出戰非特兵將有以相識而  
恩威足以相服驅之行陣益多益治此韓信多多益辦之  
術也夫用兵以賞罰爲勸沮而自崇觀以來有功者賞賚  
期敗衄者罰不及用命死敵者以收身不到爲名而無贈  
卹遇敵奔潰者以轉山迷道爲辭而反招收賞罰如此豈

後有軍政哉宜置賞功司凡士卒有功者即時推賞後有不實坐所保將帥而將之敗劫卒之逃潰者必誅臨陣死敵者寬主將之罰使必以實告而優贈卹之庶幾士氣猶可作也且祖宗嚴禁軍逃亡之法而近年不復行也嚴犯階級之法而近年不復行也嚴離部伍之法而近年不復行也嚴失主將之法而近年不復行也若此之類皆宜申明約束增重法制又納級計功之法有當議者如選鋒精騎陷陣却敵神臂弓強弩勁弓射賊於數百步外豈可責以斬首殺戮若此之類臣命將帥保明全軍推賞余又具劄子於上前論之甚詳矣謂帥府要郡之制可行但未可

如方鎮割隸州郡措置軍政當先施行於御營司及招討  
新軍乃命京東東西路京西南北路河北東路永興軍路  
淮南江南兩浙東西路荆湖南北路皆置帥府要部次要  
部帥府爲安撫使帶馬步軍都總管要部帶兵馬鈐轄次  
要部帶兵馬都監皆以武臣爲之副改路分爲副總管路  
鈐轄爲副鈐轄州鈐轄爲副都監總管鈐轄司許以便宜  
行軍馬事辟置僚屬依帥府法屯兵聚糧皆有等差遇朝  
廷起兵則副總管爲帥副鈐轄都監各以兵從正官頭行  
者聽轉運使一員隨軍一員留本路而提刑彈壓本路盜  
賊遇有盜賊則量敵多寡出兵會合以相應援本路帥臣

當職官措置兵馬先就緒者當優議施賞之命如置新軍及御營司兵並依新法團結五人爲伍伍長以牌書同伍四人姓名二十五人爲甲甲正以牌書伍長五人姓名百人爲隊隊將以牌書甲正四人姓名五百人爲部部將以牌書隊將正副十人姓名二千五百人爲軍統制官以牌書部將正副十人姓名各有所呼名使令按牌以遣而逃亡死傷皆可周知三省樞密院同置賞功司置籍以受功狀三日不檢舉施行者必罰受賂乞取者行軍法許人告遇敵逃潰者斬因而爲盜賊者誅其家屬凡軍政申明約束變更改法制者數十條皆勅榜通衢將士觀者皆奮勵余

又具劄子奏上曰朝廷所以備禦夷狄者皆在邊郡城池器械一切備具故敵未易攻金人盜賊乃擾吾腹心而中原郡縣積習承平之久城池堙頽並無器械何以禦敵金人盜賊所至官吏軍民多不能守而郡縣遂陷沒者非特士氣怯懦蓋禦敵之具不備使然宜詔諸路州郡以漸修葺城池繕治器械朝廷量行應副有能葺治備具者當旌賞一乙以勸之有旨依奏應州縣欲脩城池者申朝廷給降祠部應副又奏金人專以突騎取勝而中國騎少步多固宜多致潰散夫步不足以勝騎而騎不足以勝車此必至之理故古人之戰多以兵車衛青所以能深入匈奴者

以用武剛車自環而依以爲固也馬燧所以與雄朔方者  
以製爲戰車肩以狻猊犀象列戟于後行以載兵止以爲  
陣遇險則制衝肩也後世徒見房琯嘗以車戰敗遂不復  
用殊不知制禦突騎非車不可顧所以用之如何耳但當  
以革肩之以備火攻故古之兵車謂之革車者所以防火  
也臣在靖康間駐軍河陽制車簡易輕捷數人可推運行  
進退旋轉曲折皆如人意每車用卒二十五人行則爲行  
陣止則爲營壘平原可以馳逐險阻可以控扼士卒有所  
依而鐵騎不得以奔衝其制甚精凡造數百兩教閱月餘  
士卒皆習熟會臣屢不果用今宜頒其制於京東西俱則

告而教閱之其詳具劄子中因繪圖進呈有旨令御營司  
製造閱習諸將皆以爲可用乃頒降兩路委提刑司總領  
之又奏大河江淮皆天設之險帝王所恃以守其國者也  
然須措置控扼以人續加之乃爲我用苟委之自然不復  
措置雖大河奔湍虜騎濟渡如枕席之上況江淮哉嘉祐  
中范仲淹請於河陽上流置戰艦水軍習水戰以備契丹  
之深入當時不從其議至於靖康間金人渡河如入無人  
之境蓋無水軍戰艦以擊其渡而控扼之也昔曹操盛兵  
以臨江表周瑜以舟師破之赤壁而操終身不敢窺吳由  
是觀之使有水軍戰艦因其濟而擊之得一勝則敵人破

膽矣且虜人便於騎射而舟楫非所便以我所長攻彼所短其勝萬全但有其備使彼不敢輕濟爲利已博况勝之哉爲今日之計莫若於汳河汳江汳淮州郡置造戰艦因其俗之所宜招募水軍凡習水而能操舟者皆籍記其姓名平居許其自便有故則糾集而用之逐時教閱量行給賞不年歲間皆爲精兵則所以固吾國者莫要於此其詳亦具劄子中有旨如所請招置水軍以樓船凌波爲號又命御營司幹辦公事楊觀復齎空名告往江浙募人造船餘路委提刑司措置且總領又奏上既於河北陝西京東西四路募兵而軍器納換旗幟之類經靖康之變類多散失

內庫甲冑甚多特太華大兵卒不能勝乞降指揮條具軍器袖襖關數下諸路轉運司製造於行在置司取內庫甲改爲大小三等之制及圖畫式樣製造旗幟之屬上皆可之又詢訪陝西山東及諸路武臣材勇可用者百餘人乞召審察以備將佐偏裨之用有旨皆召赴行在自六月初至是凡四十餘日措置邊防軍政之要始漸就緒是時朝廷議遣使金國余奏上曰堯舜之道尊悌而已尊悌之至可以通於神明今陛下以上皇淵聖遣使沙漠食不甘味寢不安席思迎還兩宮致天下養以尊悌之至而堯舜之用心也然今日之事正當枕戈嘗膽內脩政事外攘夷狄

使刑政儉而中國強則二聖不使迎請而自歸不然雖使冠蓋相望卑辭厚禮朝迎暮請恐亦無益今所遣使但當奉表通問兩宮致思慕之意可也上以爲然命余草表并致書二虜酋乃以周望傳等皆借官爲二聖通問使齎表及書以往又奏上曰陛下當艱難之時爲臣民之所欣戴纂承大統宜降哀痛之詔以感動天下忠臣義士之心具言祖宗功德綏養海內之深金賊不道屠戮生靈之酷社稷艱危之急二聖播遷之痛今日所以賴天下士民同心協力相與扶持保守以致中興者凡所告諭必盡誠意明白言之無有隱諱使讀而聞之者雖武夫悍卒知所激勵

然後按其所言次第行之無爲虛文務施實惠必能昭格  
天意感激人心轉危爲安有不難也昔陸贄有言獲非常  
之危不可以常道安解非常之紛不可以常理論又曰動  
人以言所感已淺言又不切人誰肯懷正今日之謂上乃  
命余撰擬詔文進呈頒降又具劄子以謂艱難之際賦入  
狹而用度廣內自朝廷外至州縣監司宜省冗員以節浮  
費上命中書條具乃詔省臺寺監官以繁簡相兼復開封  
府舊制城學官員額罷提舉常平司併歸提刑司罷兩浙  
福建市舶司併歸轉運司復募職曹官舊制非萬戶縣不  
置丞縣吏員三分之一又請以三省堂吏依祖宗法轉官

不得過朝請大夫初陳乞出官止爲通判應前宰執子弟以恩數帶貼職及侍御以上並罷宰執及見任宮觀待闕未有差遣京朝官以上俸錢並減三分之一有首從之是時四方潰兵爲盜如祝靖薛廣党忠闇瑾王在之徒皆招安赴行在凡十餘萬人余謂今日盜賊正當因其力而用之如光武用銅馬綠林下江之屬以定天下曹操亦用黃巾以破袁紹顧所以駕馭之者如何耳不移徙其部曲則易以叛去移徙之則彼必致疑正當以術制之使由而不知則可乃以此意奏上命御營司差官每招安到一頭項即先號令有元係良民頭項歸業及有營房兵卒頭項歸業者

公券及公據遣之遣去太平又擇其羸弱不勝病者放散  
獨留強壯願充行陣立功者以新法國結每一軍差大小  
使臣充部隊將及擇有才略者爲統制官以統之而其頭  
領皆命以官於他統制下充准備將領及差遣之類於是  
無叛去者獨淮南副賊杜用山東李昱丁順揚進管擁眾  
數萬不可招而拱州之黎驛單州之魚臺皆有潰兵數千  
人作過余奏上曰方今朝廷外有大敵而盜賊乘間竊發  
擾吾郡縣其勢不先靖內寇則無以禦外侮盜賊雖主於  
招安然不震耀威武使知所懼則彼無所忌憚勢難遽平  
宜分遣兵將討殄數處則餘者有服上以爲然乃命御營

都統制王淵率師討杜用都巡檢劉光世討拱州叛兵統制官喬仲福討李昱韓世忠討魚臺賊不旬月間皆破之斬杜用李昱獲甲馬寶貨不貲餘悉平殄丁順楊進乃就招撫司招安過河惟李孝忠者破襄陽擾京西湖北余建議遣范瑊討之范瑊者在靖康間爲統制官將兵河東頗宜力其後歸京師權步軍指揮使京城破淵聖幸虜營留不遣有閤門宣贊舍人吳革者私結禁衛欲劫虜營迎淵聖歸謀洩爲瑊及殿前都虞候左言誅之上即位瑊不自安朝廷以其極兵馬降詔言節義所以責士大夫至於武臣平伍當關略之以責後效瑊向夕側至是余奏遣之討

賊使離都城瑣以朝廷委用之心乃安卒殺孝忠招安其  
餘以赴行在一日與執政奏事便殿上繪續背心一宣諭  
曰道君自燕山密遣使臣齎來領中有親書八字曰便可  
即具來赦父母余與執政皆泣涕奏曰此乃陛下受命於  
道君者宜藏之宗廟以示後世道君遠幸沙漠所望於陛  
下者如此臣敢不竭盡駑鈍措置邊事以副陛下聖孝思  
慕之意執政退余留身論及靖康間事上曰淵聖勤於政  
事省覽章奏有至終夜不寢而卒有播遷之禍何也余奏  
曰淵聖在東宮十餘年令德聞于天下及即大位憂勤恭  
儉雖古之賢主無以遠過適當國步艱難之時勤儉有餘

而英明不足不能分別忠邪群言紛至爲小人之所惑故  
卒誤大事人主之職但能知人而任之近君子而遠小人  
雖不親細務大功可成不然雖衡石程書衛士傳餐亦無  
益也上以爲然余因論靖康之初金人犯闕中國所以應  
之者得策九二道君內禪一也淵聖固守二也使其後更  
得一策中國可以無事而和與戰兩者皆失之遂至大故  
而夷狄之患至今爲梗方金人初犯闕提兵不過六萬人  
旣薄城下累日攻擊知都城堅而士卒奮勵不可攻則遣  
使厚有所邀求而請和臣獻策淵聖以謂金人之所邀求  
有可許者有不可許者宜遣使者往來款曲與之商議俟

吾勤王之師既集然後與之約其可與者許之其不可與者堅執而勿許則約易成而和可久當時不以爲然一切許之其後果不能如約遂再入寇此失其所以和也勤王之師集于都城四面者三十餘萬臣獻策淵聖以謂兵家忌分宜使節制歸一用周亞夫困七國之策以重兵與之相臨而分兵收復畿邑使無所得糧俟其困而擊之一舉可破當時不以爲然置宣撫司盡以勤王之兵屬之故姚平仲得先期舉事而朝廷懲劫寨小衄不復議兵賊退又不肯邀擊遂使金人有輕中國之心而中國之勢日弱此失其所以戰也夫機會之來間不容髮一失機會悔不可

追譬猶醫者治病證候既明而不投藥遂有至於不可料理者矣今日機會尤不可失願陛下以靖康爲鑑審處而決斷以應之庶幾可以成功上曰靖康之初能守而金人再來遂不能守何也余奏曰靖康之初與靖康之末其勢不同條目甚多臣請論其大者金人初入寇未知中國虛實亦無必犯京闕之意特中國失備無兵以禦之故使得渡河以至城下而粘罕之兵亦失期不至及其再來兩路並進遂有吞噬中原之心此其不同若一也靖康之初賊至城下不數日問勤王之兵已集及其再來賊已圍城始以蠟書募天下兵遂不及事此其不同者二也靖康初賊

系于西北隅而行營司出兵屯于城外要害之地四方音  
問絡繹不絕勤王之兵既集賊遂斂兵不敢復出其後再  
來朝廷自決水以渰浸京城西北瀰漫數十里而東南不  
屯一兵使賊反得以據之故城中音問不傳於外而外兵  
亦不得以進此其不同者三也淵聖即位之初將士奮勵  
用命其後賞罰失當人心稍解體此其不同者四也金人  
圍城之初城中措置有叙號令嚴肅晝夜撫循未嘗少休  
聞其後無任其責者賊至造橋渡壕恬不加卹以十數人  
登城將士遂潰此其不同者五也臣在樞密院時措置起  
天下防秋之兵降詔書已累月及臣宣撫河北即詔減罷

大半蓋朝廷專恃和議以謂金人必不再來一切不爲之備故靖康之末不能守者勢不同而禍生於所忽也翌日奏事因哀聚靖康初建議措置與金人約和用兵次第劄子及朝廷分置宣撫司指揮後在宣撫司論不當減罷防秋兵章疏進呈上皆命留中因宣諭曰宣撫司官屬靖康間迫逐非辜可並與差遣乃條具進呈有旨曾任卽官監司人與知州軍差遣曾任館職以上人與通判差遣餘並陞一等選人與優便占射余曰奏上曰靖康間雖號爲通言路然臺諫官如李光陳公輔余應求議論顛峭皆遠貶責塞之也乃納劄子勸上以明恕蓋人言以恭儉足國

用以英果斷大事上皆嘉納與執政同進呈臣僚論宋齊  
愈事初齊愈爲右司員外郎自園城中出詣行在自陳以  
病在告不與僞楚事除諫議大夫至是臣僚論其首建議  
請立張邦昌按據甚明上以其欺罔且首建僞楚之議震  
怒命付御史臺鞠治證驗明白齊愈款服衆頗爲之救解  
上曰齊愈姦惡悖通如此豈可不正典刑使邦昌之事成  
置朕何地衆乃不敢言有旨依法定斷仍榜其罪於通衢  
又進呈御史臺鞠治陳仲余大均洪翳王及之等公事皆  
在園城中誘置內人爲妾及目抄剗金銀自盜入已上曰  
此何等時乃敢如此初四人者罪不測衆救解之有旨情

重者長流海島餘編置嶺南又進呈留守司鞠治承華夫人李氏公事初張邦昌退歸府第出禁中李氏送之有語指斥乘輿上聞之命留守司同御藥院於內東門推治李氏款服且言邦昌居福寧殿李氏嘗以養女陳氏侍邦昌寢其後邦昌之婦入禁中乃留其親隨人而易以陳氏歸府第上震怒謂邦昌敢居宮禁寢殿姦私宮人可以見其情狀余奏曰邦昌既敢僭竊位號此乃細故耳然上竟以此深罪邦昌有旨李氏決眷降配軍營務下民爲妻又宣諭王時雍逼迫道君出郊之狀余奏曰人臣不能伏節死義而不顧君父一至於此雖大姦有所不若蓋天下所同

博妖姑俟邊事就緒徐議再行遣未爲晚也因納劄子乞  
減上供之數以寬州縣修茶鹽之法以通商賈剋東南官  
田募民給佃俾弓箭刀弩手法養兵于農籍陝西保甲京  
東西弓箭社免支移折變而官教閱之又請於陝西河北  
東路京東西置制置使使以遠近相應援有旨皆付中書  
省條具進呈取旨其後遂置諸路制置使而餘事以余罷  
政皆不果行

建炎進退志總叙下下

初余嘗從容奏上曰朝廷外則經營措置河北河東兩路  
以爲藩籬葺治軍馬討平盜賊內則修政事明賞罰皆漸

就緒獨車駕巡幸所詣未有定所中外人心未安夫中原者天下形勢根本也一去中原則人心搖而形勢傾矣臣嘗建巡幸之策以關中爲上襄陽次之建康爲下今縱未能行上策猶當適襄鄧示不去中原以係天下之心選任將帥屯列軍馬控扼要害以折虜人之謀使今冬無虞車駕還闕天下之勢遂定而近日外議紛紜皆謂陛下且幸東南果如所言臣恐中原非復我有車駕還闕無期而天下之勢遂傾難復振矣上曰但欲迎奉元祐太后及津遣六宮往東南耳朕當與卿等獨留中原訓練將士益兵聚馬雖都城可守雖金甌可戰矣余再拜贊上曰陛下英斷

如此雖漢之高祖光武唐之太宗不是過也因言履艱難  
之運者不宜懷安高祖光武太宗皆身將兵披甲冒冒矢  
石於馬上得之今固不待如此但車駕不去中原則將士  
思奮人百其勇盜賊不敢覬覦兩河易爲經略雖少勞苦  
而後享安逸儻喻取一時目前之安如後患何中外未知  
陛下聖意乞降詔以告諭之上乃命余擬撰詔文頒降觴  
之兩京讀者皆感泣因措置迎奉隆祐太后津遣六宮以  
徽猷閣待制孟忠厚爲提舉一行事務步軍指揮使郭仲  
荀統兵扈衛餘令有司排辦後半月上忽降手詔欲巡幸  
東南以避狄令三省樞密院條具合行事件以聞余留之

曰具劄子極論不可且言自古中興之主起於西北則足  
以據中原而有東南漢光武唐肅宗是也起於東南則不  
足以復中原而有西北晉元帝是也蓋天下之精兵健馬  
皆出於西北而中興之主撥亂定功以兵馬爲先一失西  
北則二者無自得之形格勢禁非特失地利而已今翠華  
儻或南幸委中原而棄之豈惟金人將乘間以擾吾關輔  
盜賊且將蠡起跨州連邑朝廷號令不行精兵健馬反以  
遺賊道路梗塞人心驚潰陛下雖欲還闕有不可得况治  
兵勝敵以歸二聖哉惟南陽光武之所以興有高山峻嶺  
可亭控扼有寬城平野可屯重兵西通關中可名將士南

運荆湖巴蜀可取貨財東達江淮可運糧餉北距三都可  
遣救援暫議駐蹕自冬徂春兩河指畫就緒即還汴都策  
無出於此者上乃取運運幸東南手詔令與執政商議翌  
日再具劄子後楚漢柴陽成臯間曹操袁紹官渡事論天  
下形勢甚詳又與執政議於上前余曰今乘舟順流而適  
東南固甚安便但一去中原勢難復還夫中原安則東南  
安失中原則東南豈能必其無事一失機會形勢削弱將  
士之心雖散變故不測且有後艱欲保一隅恐亦未易臣  
誠不敢任此責且陛下既以降詔獨留中原人心悅服柰  
何詔墨未乾失大信於天下願斷自淵衷以定大計上乃

許幸南陽令措置合行事件有旨以觀文殿學士范致虛  
知鄧州委以修治城池繕葺宮室官府朝廷降監鈔錢帛  
委轉運使范之才等儲峙糧草命發運司撥江湖綱運由  
襄江通濟命四川變轉輕貨陸路自陝西江路自歸峽以  
入南陽以黃潛厚爲提舉一行事務以郎官陳袞李儒幹  
辦頓遞以發運使李祐爲隨行轉運使將以秋末冬初擇  
日啓行而潛善伯彥陰以巡幸東南之計動上意其議頗  
傳于外客或謂余曰士論洶洶咸謂密有建議者東幸已  
決南陽聊復爾耳盍且從其議乎不然事將變余曰天下  
大計在此一舉國之安否存亡於是乎分成今已行僕或

改易吾當以去就爭之且上英睿必不為異議所惑不然  
吾可貪員寵祿為保身計虛受天下之責哉然自是雖未  
嘗有改議巡幸之命而上每批出改易已行指揮如批買  
馬祇令每州買馬百疋余奏上曰元降買馬指揮不立額  
數祇令有馬及格尺者依等第給價買之今若每州限以  
百疋即無馬去處必須科配却反成搔擾及又批出募兵  
改刺新軍有害軍政余奏上曰元降募兵指揮許改刺者  
祇謂潰散兵卒無營房可歸者即非以見在營房兵卒許  
之改刺目以中書元批旨進呈上意乃悟又批出李權已  
經淵聖責降宮觀今又責之為太重余奏上曰李權在圖

城中淵聖委令提舉京城南壁實守陳州門一帶金人造橋渡壕懼不省察故責降官觀其後竟自所造橋渡兵破城擢之罪大矣特城破之後淵聖不暇再行遣耳今以散官安置已爲輕典儻猶以爲重何以戒失守使後來者任責潛善左右之甚力上乃令降作分司又批出謂彥國吳玠擾擾東南並落職與官觀令學士院降詔慰撫初余未至行在彥國已除知江寧府委令脩城及繕治官室朝廷給鹽鈔十萬貫彥國具劄子以爲不足用余奏上曰崇觀間賜臣僚一第費百萬今委彥國以脩城又新經兵火之餘令其治官室祇給錢十萬貫誠爲太寡有旨撥兩浙

淮南監鈔四十萬貫付之爲五十萬且降指揮令其目陋  
就簡不事華壯上一日忽宣諭彥國脩城等搔擾余奏上  
曰創脩宮室一新城池鳩工聚材計置磚灰工料浩大集  
事之初其勢不得無擾莫若明降指揮令其撥移諸州神  
霄宮及常平司廨宇一切拆舊脩蓋城壁亦因舊增葺使  
彼有所遵守則費用省而搔擾之患自息乃命尚書省劄  
下既而復批出責降且命降詔蓋潛善以彥國於余爲姻  
家故密啓之以爲譖愬之端也既得上批札適同日得江  
寧府奏狀彥國已死又吳昉無職名可落余謂官觀太優  
將上取旨上曰彥國已死不須行遣乃令放罷吳昉委提

刑司取勘仍降詔慰撫東南如此之類批出者頗多初余  
每回留身奏事從容論治體及有所規諫雖苦言逆耳上  
皆嘉納至是奏陳當世急務擬進指揮多不降出余固知  
譖愬之言其入已深一日對內殿留身奏上曰臣以菲材  
誤蒙聖慈使待罪宰相當國家艱難之時忤以天下之重  
臣夙夜黽勉雖久患疴疾亦不敢在假將理思竭駑鈍以  
報稱知遇之萬一近日屢煩宸翰令改正已行事件臣逐  
一按據辯明幸蒙聖察又所進擬措置機務多未蒙降出  
顧臣孤拙寡與獨荷陛下特達之知忌嫉者多恐必陰有  
譖愬而離間臣者書言時則勿有間之而管仲亦以信用

君子而必以小入參之爲害。霸夫君子小人若冰炭然。勢不兩立。治亂安危係其進退。在人主有以察之而已。因出劄子極論君子小人之理。且言靖康間。淵聖聽用唐恪而恪姦邪舞智以御其君。能得淵聖之心移易是非。變亂白黑。卒譖罷徐處仁吳敏而奪之相。其後遂致禍。故方陛下勵精圖治。枕戈嘗膽。振起中興之功。誠不願蹈覆車之轍也。夫疑則當勿任。任則當勿疑。持狐疑之心者。來讒賊之口。願致察於此。上慰諭曰。無此。但朕思慮偶及之耳。其餘章疏見省。覽涕脫降。出余拜謝而退。至八月五日。告廷遷余銀青光祿大夫尚書左僕射兼門下侍郎加食邑實封。

而除潛善右僕射兼中書侍郎既命兩相則潛善顯沮張  
所而罷傳亮余以去就爭之遂定進退雖知墮潛善策中  
蓋勢不得不然也初張所既受招撫使之命建言乞置司  
北京候措置就緒即渡河移司息冀以所募兵內結陷虜  
兵民復懷衛濬三州解邢洛磁相中山之圍以圖收復真  
定既有期矣所尚留京師招集將佐措置錢糧而河北轉  
運使權北京留守張益謙奏招撫司輕擾不當置司北京  
且言所欲起北京屯戍兵給用器甲爲非是緣置招撫司  
河北盜賊白晝殺人不若罷之專以其事委帥臣蓋張慈  
久爲河北都運與益謙善慈以余嘗沮其執政故附潛善

張參相與謀使益謙宣此奏以沮張所而惑上意也余奏  
上曰張所畫一乞置司北京候措置就緒日濟河今所尚  
留京師以招集將佐故未行不知益謙何以知其搔擾而  
言不當置司至於守兵器甲不可輟那當令招撫司具合  
用數申陳自朝廷給降可也朝廷以金人攻圍河北民無  
所歸聚爲盜賊故置司招撫因其力而用之以解河北之  
急豈緣置司乃有盜賊今京東京西群盜嘯聚攻掠州縣  
豈亦招撫司所致耶方時艱危朝廷欲有所經略益謙小  
臣乃敢非理公然沮抑此必有使之者不懲之無以戒妄  
議而沮姦臣上乃令降旨招撫司依畫一置司北京就緒

日疾速渡河不得抽摘寸兵具合用器甲申朝廷應副如  
招撫到河北兵民嚴行約束無令作過張益謙令分析以  
聞尚書省既劄下矣樞密院復以益謙申狀將取上旨凡  
千餘言痛詆招撫司令北京行下州縣出榜後數日乃關  
過尚書省余始見之乃以樞密院畫旨并尚書省元降指  
揮同將上進呈與伯彥禔爭於上前余奏曰張益謙所奏  
皆細故情涉觀望尚書省已得旨行下而樞密院又別取  
旨痛詆嘗之此何理也不過欲與益謙相表裏以細故而  
害大計沮抑張所耳朝廷以兵力不足而河北之事急故  
委張所以招撫因兵民盜賊之力以捍強敵而復故地今

借置甫就緒行且成功而沮抑之如此州縣將士知朝廷  
議論不同安肯協力棄事功於垂成良可惜也臣不知朝  
廷之於張所欲其成邪欲其敗邪欲其成則不當沮抑之  
如此欲其敗則不若罷去之無使挾私害公而不爲國家  
慮也沮抑一張所有何所難致誤國家之大計使河北兵  
民盡爲金人之所得河北州縣盡爲金人之所有中原且  
弗能保將誰任其責靖康間惟朝廷議論不同無以公滅  
私之意遂及禍故今豈可復蹈覆車之轍耶伯彥慈無以  
對第云初不知尚書省已降指揮上乃令樞密院改正作  
依前降指揮施行既不得逞卽爲付亮之事初王燮傳亮

既受命爲經制使副即具畫一申朝廷以謂河東州縣多  
爲金人所陷沒至與陝西接連如河中府解州亦爲所據  
與陝府相對以河爲界今經制司所得兵纔及萬人皆烏  
合之衆其間多招安盜賊及潰散之兵未經訓練拊循難  
以取勝乞於陝府置司訓練措置召募陝西正兵弓箭手  
之在民間不出者及將家子弟不旬月間可得二萬人陝  
西正兵及弓箭手皆精兵以重賞總兵賞罰不明皆益於民  
困不出者應募者皆其家人也故邊境亮敵厚賞給以募  
之費一可與正兵相爲表裏其勝可以必且一面結連河東  
山寨兼併度州縣可復即復之可以渡河即乘機進討以  
恢復河陽河中解州汾河一帶據險以扼其衝漸議深入

以復澤潞太原願當方面之寄有旨從之撥川綱之在陝西者使召募西兵又命陝西京西轉運司悉力應副璩亮行纔十餘日樞密院復取旨令留守宋澤節制即日過河亮申朝廷以與前議及元降指揮不同今欲即令過河無不可者但河外皆金人界分本司措置全未就緒既過河後何地可爲家計何處可以得糧烏合之衆使復爲金人之所潰散何自可以得兵亮等不足惜第恐有誤國事余將上進呈奏曰河東今日之勢不同河北所失不過數郡其餘皆爲朝廷守王師渡河猶有駐泊得糧之處河東州縣太半陷沒沿河一帶自解州河中至河陽懷衛皆爲金

人所據今經制司軍旅未集遽違前議敗之渡河遂爲孤軍儻爲金人所覆不知朝廷何所更得將佐士卒當此一道而經略之古將帥不從中御之願且如前議盡將帥之智慮而責成俟其淹曠時月而無功則朝廷自有法以待之何必敗之若是之遽而潛善伯彥皆謂不使之亟渡河且失機會如亮等但欲逗遛耳余曰兵事不可遙度目下亦未見有機會可乘但當委任將帥使擇利而動耳今不卹先旨置未辦集而敗之使渡河正所以爲賊餌不見其利也且亮等受命而行纔十餘日申明朝廷前後所降指揮不同乃將帥之職豈可便以爲逗留如趙充國堅執屯

山之議不聞宣帝以爲罪也臣以謂不若只依前降指揮  
爲便上以潛善伯彥執議聖意頗惑依違不決者累日余  
留身極論其理且言潛善伯彥始極力以沮張所賴聖鑒  
察之不得行其志又極力以沮傅亮蓋招撫河北經制河  
東皆臣所建明而張所傅亮又臣所薦用力沮二人乃所  
以沮臣使不安其職臣每鑒靖康大臣不和之失凡事未  
嘗不與潛善伯彥商議而後行不謂二人乃設心如此如  
傅亮事理明白願陛下虛心以觀之則情狀自見上曰俟  
批出只令依元降指揮於陝府置司至翌日批出乃云傳  
亮兵少不可渡河可罷經制司赴行在蓋潛善留身密啓

之也余留御批將上奏曰臣昨日論傳亮事已蒙宣諭俟批出依元降指揮繼奉御批乃罷亮經制使不知聖意所謂上曰亮既以兵少不可渡河不如且已余奏曰臣論傳亮乞降指揮非謂不使之渡河緣亮昨乞於陝府置司與金人對壘募兵訓練擇剋過河收復州縣朝廷已從其請今行未半月遽改命使宗澤節制郡令過河臣謂不可者有三事從中御不盡將帥之慮一也軍旅未集驅烏合之衆渡河即成孤軍必爲金人之所潰二也屢潰之後朝廷未有將佐士卒可以當河東一道之寄三也故臣以改命爲非是當依前降指揮以責成功今乃緣臣爭論之故所

與經制司罷之此必潛等以私害公陰有以蔽聖聰  
欲以沮臣使去耳臣荷陛下特達之知起自罪謫付以國  
柄方艱難之秋但知一意以為國家苟可以持危扶顛者  
知無不為庶幾仰副委任之萬一誠以傅亮經制河東乃  
今日所當為之大者潛善等乃欲以非理沮罷之此而可  
沮則其他孰可為者今御批猶未施行願陛下致察於此  
尚容臣得待罪宰相以圖報稱不然臣豈敢尸祿貪冒寵  
榮以虛負天下之責哉上曰如傅亮人材今豈難得余素  
曰臣嘗歎與亮語觀其謀略智勇真可以為大將詢之士  
大夫亦以為然今以為經制副使姑試之耳假以時月必

有可觀使亮如其所請臨敵退撓而無成功臣願受誤國之罪今未嘗用而遂罷之則不可古之御將帥者恐不如此昔高祖何嘗自知韓信但以蕭何薦之為大將設壇場擇日而拜之何之所以知信者亦以屢與之語而已使高祖不能用何之言而將韓信則何亦必不敢當相位今人材難得而將帥之材尤為難偶得一二而朝廷所以輟那人兵應副錢糧器甲者種種辦具非涉旬月不能遣而啓行未幾遂以寸紙罷之待將帥之輕如此孰不解體此臣所以深為陛下惜也且潛善所以必欲罷亮者意不在亮乃以沮臣陛下不察則臣亦何敢安職恐終無以助陛下

致中興之功上無語余以御批納上前曰聖意必欲  
亮乞以御批付潛善施行臣得乞骸骨歸田里臣非敢  
為去就更望陛下留神熟思之使亮不罷則臣何敢決去  
目再拜榻前上猶慰諭謂不須如此余既退聞亮竟罷  
入表劄求去上遣御藥宣押赴都堂治事余到堂復上馬  
歸再入第二表劄皆批答不允翌日遣御藥宣押赴後殿  
起居隨宰執奏事訖余留身上曰卿所爭事小何須便為  
去就余奏曰人主之職在論一相宰相之職在薦人材方  
今人材以將帥為急恐不可謂之小事儻以為小臣以去  
就爭之而天意必不可回臣亦安敢不必去目再拜榻前

復奏曰臣以愚忝仰荷瞻知初無左右先容之助龍飛之  
初首命為相潛善伯彥自以謂有攀附之功方虛位以召  
臣蓋已切齒及臣至而議論偽楚建請料理河北河東兩  
路車駕巡幸宜留中原皆與之不問而獨蒙陛下嘉納聽  
從固宜為其媚嫉無所不至方潛善未相所以譖翹指摘  
臣者不過欲為相而已今既已相而猶沮抑不已以是為  
非變白為黑此不過欲臣去耳臣立於群枉之中獨賴陛  
下察之得以盡其區區之愚如傅亮之事曉然無可疑者  
又不蒙聖察是臣薦進人材不足用議論國事不足採其  
失職大矣豈敢復任宰相哉臣請以世俗之事譬之今有

疾病者衆醫不能治而求之於草澤既至而為之紫色診  
脉曰病如此宜服某藥則愈而左右衆醫沮之使不得投  
藥石則草澤之醫亦將辭退豈敢任責又如大厦之將傾  
而命都料匠以脩之必聽其擇材以易棟楹設木以事撐  
柱持危扶顛乃可復全而衆工沮之主人者不察既不使  
之得以易棟楹又撐柱之具悉拔棄之則都料匠亦將告  
去何則覆壓之虞難任責也方朝廷承平無事之時宰相  
猶可尸祿備員以冒寵榮今艱難多故之秋當惜分陰人  
主以其相為不足任則當亟罷人臣自度不能其任則當  
亟去之臣自度終無以當陛下之委任而副天下之責望

敢久居此妨賢路哉且臣嘗建議車駕巡幸不可以去中原  
潛善等必以此動搖聖意故力沮張所傳亮而去臣臣  
東南人豈不願奉陛下順流東下為安便哉顧車駕巡幸  
實天下人心之所繫中國形勢之所在一去中原則後患  
有不可勝言者故不敢雷同衆說以誤大事願陛下以宗  
社為心以生靈為意以二聖未還為念留神於此勿以臣  
去而其議遂改也臣仰荷天地之德雖去左右豈敢一日  
忘陛下不勝犬馬依戀激切之至目泣辭而退遂上第三  
表劄客或謂余曰公決於進退之義得矣顧議者不止將  
自患禍不測奈何曰大臣以道事君不可則止吾知盡

事君之道不可則全吾進之節而已患禍非所卹也  
禍而不去彼獨不能諷言者詆訾而逐之哉天下自有公  
議此不足慮翌日降麻告廷除觀文殿大學士提舉杭州  
洞霄宮加食邑實封時八月十八日也麻制中乃以余募  
兵買馬勸民出財為罪又謂行道偽命臣僚為報私怨納  
御批除目為慢君命不責翁彥國為黨庇姻戚爭議傅亮  
渡河為阻格王師如此類十數事皆潛書密以付詞臣余  
具奏頗辭免不敢當觀文殿大學士降詔不允是時尚未  
受左僕射之命有旨令閣門併賜兩告不得已拜受陳謝  
即行以九月辛抵鎮江府聞辛道宗之喪變於秀州宿留

不敢行者半月繼聞其掠毗陵焚丹陽遂以客舟由外江  
歸梁谿而言者再論麻制中所指以為罪者又言余傾家  
貲以犒叛卒為緋巾數千頂與之遣弟迂賊陰與之通朝  
廷不復究問其實有旨落職令鄂州居住讒謗如此自非  
上恩保全有以照見其無他雖欲慶江湖之善地豈可得  
也聞命即由江東西以抵武昌適江上盜賊紛擾權寓居  
于蘄邑之崇陽僧舍中暇日聞建炎初備位宰司日記追  
思以迂拙甚陋之姿荷上知遇付以國事當軸秉鈞纒七  
十有五日竟以讒罷曾無渝埃之補而罪戾之積有踰丘  
山尚竊廩祿飽食而逸居慙赧深矣然余既罷之後張所

亦以罪去傳亮辭以母病不起行在而歸陝西招撫經制  
司皆廢車駕遂東巡而兩河郡縣皆陷于賊金人以次年  
春擾京東西深入關輔殘破尤甚此豈人力也哉因取進  
退之大槩次第而總叙之與夫制誥詔命書疏表劄編纂  
附著合爲十卷目之曰建炎進退志廢發覽者有所考焉  
至於臣僚之所建明四方之所陳請陟降人材改革政事  
自有史官書之此不復錄建炎二年十月二十日具位李  
綱叙

宋丞相李忠定公奏議附錄卷之二